

Mairino Soiso

En còu, i èro douos souores bessounos que si criavon Soiso e Zefirino.

Eron bessounos e staion me li sious parens e la siou grand-maire qu'èro la mairino de Soiso. Staion lèis en retirage subre la couolo, à Bertemou.

Es la grand-maire, que si criavo Mairino Soiso, que bailavo li pichounos perque li parens èro en campagno toute lou journ.

Aquelo mairino aiò en gros gal negre. E li pichounos èron espaventaus per aquel gal perqu'èro malign coumo lou diau.

En journ, li parens e li pichounos s'en soun enanas à Pelasco doun aion trouba na campagno de mita.

E Mairino Soiso, souleto à lei lou retirage de Bertemou, èro malerouso.

Alouro, li parens i an mena la pichouno Soiso per li tenir coumpanio.

Ma Soiso vouiò rè star damou, vouiò anar me sa souore bessouno...

La nuech, à Bertemou, Soiso durmiò me sa mairino e aiò pòur.

Cado nuech, Mairino Soiso si levavo, calavo à la couino, atisavo lou fioc souto en pignatou. E aquel pignatou sentiò l'acident, lou diau ! Mairino viravo en pincel dintre lou bouiou e dihò, très còus :

-Viro, viro pignatou ! Fai-mi anar doun lis autres soun ! Viro, viro...

E à la fi, Mairino Soiso disparèissiò.

E la pòuvro Soiso si troubavo souleto lèi la couino...

En journ, a prouva de far parier que la siou mairino, e a dich très còus coum'elo, en virant lou pincel à lèi lou bouillou :

-Viro, viro pignatou ! Fai-mi anar doun lis autres soun ! Viro, viro...

E, d'en crep, la pichino Soiso s'es troubau à la cimo d'en gros castanier en pleno nuech !

Daval souto, i èro en bouc drech coum'en ome que si teniò denant en gros fioc. A l'entourn d'aquel bouc i èro de gens que faion en rescouncil e que lou gardiavon, que l'escoutavon.

Lou bouc dihò :

-Qu'avès fach de mal, ancuèi ?

E cadu cuentavo la siou.

Quour'es vengu lou tourn de Mairino Soiso, lou bouc li fa :

-E tu, Mairino Soiso, qu'as fach de mal ?

-O iou, ai manda lou gal negre su la pichouno e i a pounch li cambos e li mans !

-Bè per aco ! Aco es rè de tout !

-L'ai menau à la sourço de Bertemou e i a fach bèure na pleno bòlo d'aquelo aigo empouisounau !

-Sabès bè qu'es rè empouisounau aquelo aigo, qu'es en remèdi ! Aco es tròu ! As rè fach de mal. Ti cal tiar lou gal, que senou ti mandou dintre lou fioc !

-O no ! Rè lou gal !

-Alouro carcu d'autre ! As que de tiar lou tiou enfant que dema piò mal mul à Ferissou.

-O malur ! Qu'après li gendarmoi m'estrèmon !

-Siès na masco, noun ? As que de ti cambiar en na rèis de melze su lou cami de Ferissou. Lou mul s'escambo e lou tiou enfant si tiò. E lou còu es fach !

A n-aquel moument en gal a canta. Ero de mati bouon ouro. Mairino Soizo e la

pichino Soizo si soun retroubaus dintre la couino da retirage de Bertemou, denant lou fioc e lou pignatoun.

-Que fas èici, Soizo ? Vai-ti courcar, a brama Mairino !

Lou lendema, Soizo a cuenta tout aco à sa maire qu'èro venguiò la vèire.

La maire a piha en destralou, es piau su lou cami de Ferissou, a trouba la rèis dal melze, l'a chapoulau à cò de destral e s'en es recalau à Bertemou.

A Bertemou, a trouba Mairino courcau, aiò lis brasses routs, èro mouriboundo. Es mouorto lei la nuech.

Carque jous après, la famiho s'es retournau à Pelasco, e coume lou gal èro toujou marit, l'an tia.

N'an mancou pouscu lou manjar perqu'èro toute negre à lei tambè.